

# **Nsumuinu ya Mukelenge Yesu**



## **Mukoko Mujimine**

Mukelenge Yesu wakabelela lusumuinu elu ne, Muntu kayi wa munkatshi muenu, bikaleye ne lukama lua mikoko, pajimijeye mukuabo, kena ushiya minga makumi tshitema ne tshitema mu tshipela wenda ukeba udi mujimine too ne paumoneye? Paumoneye, neawambule pa diapa ne mutshima usanka. Papinganeye kuende, neabikile balunda bende ne bena mutumba nende neabambile ne, Nusanke nanyi, bua nakumona mukoko wanyi wakadi munjimine. Ndi nuambila ne, Nunku kabidi disanka dia mu diulu bua muntu umue mubi wakukudimuna mutshima wende neditambe disanka bua bantu bakane makumi tshitema ne tshitema badi kabayi ne bua kukudimuna mitshima yabo.

## **Mpalata Mujimine**

Mukashi kayi, bikaleye ne mpalata dikumi, (biamu bia argent bu makuta a bantu ba kale) pajimijeye umue, kena utemesha muinda, akombe mu nzubu, akebe bimpe too ne pamumoneye? Pamumoneye, neabikile balunda bende ne bena mutumba nende, neabambile ne, Nusanke nanyi, bua nakumona mpalata wakadi mujimine. Ndi nuambila ne, Nunku kabidi disanka didi ku mesu kua banjelo ba Nzambi bualu bua muntu umue mubi wakukudimuna mutshima wende.

(Luka 15:3-10)

## **Muana Mujimine**

Yesu wakamba ne, Muntu wakadiku, wakadi ne bana balume babidi. Muana muakunyi wakambila tatu wende ne, Tatu, umpe luanyi luseke lua biuma lualua kundi. Yeye wakabatapuluila bintu biende bionso. Pakapita matuku makeke, muana muakunyi wakasangisha bintu biende bionso, wakaya mu luendu kule ku luseke lukuabo; wakatangadijaku bintu biende bionso ku malu mabi akenzenzeye. Pakamaneye bintu bionso, tshiole tshinene tshiakalua ku luseke alu; wakabanga kukengela bintu. Wakaya, wakadilamika kudi muntu wa ku luseke alu; muntu awu wakamutuma mu madimi ende bua kudisheye ngulube. Yeye wakasua kuuja difu diende tente ne bipusu biakadi ngulube idia. Kakuakadi muntu wakamupa tshintu. Pakakatamukeye, wakadikonka munda ne, Bena mudimu ba tatu wanyi badi bungi munyi? badi ne bia kudia bia bungi ne bintu bikuabo bisambuke pamutu kabidi, kadi meme ndi nfua ne nzala kunoko! Nembike, nenye kudi tatu wanyi, nemmuambile ne, Tatu, nakuenzela diulu bibi, nakuenza bibi ku mesu kueba kabidi. Tshiena bianyi muimpe kabidi bua kumbikilabo ne, Muanebe, umbueje mu mudimu bu bena mudimu bebe bakuabo. Yeye wakabika, wakalua kudi tatu wende. Pakadiye kuakua, tatu wende wakamumona, luse luakamukuata, wakanyema lubilu, wakamuela

tshitupa ku nshingu, wakamutuatua mishiku. Muana wakamuambila ne, Tatu, nakuenzela diulu bibi, nakuenza bibi ku mesu kueba kabidi; tshiena bianyi muimpe kabidi bua kumbikilabo ne, Muanebe. Kadi tatu wende wakambila bantu bende ne, Nulue lubilu ne tshilulu tshidi tshitambe buimpe, numuluatshishetshi; numuele kakanu ku munu ne bisabata ku makasa. Nulue ne muana wa ngombe udi ne manyi, numushipe, tudie bietu, tusanke bietu, bualu bua muana wanyi ewu wakadi mufue, udi ne muoyo kabidi; wakadi mujimine, wakamueneka. Bakabanga kusanka.

(Luka 15:11-24)

### **Lusumuinu Lua Muena Samalea**

Muntu wakabika mu Yelushalema, wakadi upueka ku Yeleko; wakatukidila mu bianza bia banyengi, bakamuvula bilulu biende, bakamukuma, bakaya, bakamushiya ne tshioyoyo. Muakuidi wa Nzambi wakadi upueka mu njila awu; pakamoneye muntu, wakapitshila ku luseke lukuabo. Muena Lewi muomumue, pakalueye ku muaba awu, pakamumoneye, wakapitshila ku luseke lukuabo kabidi. Kadi muena Samalea wakadi ulua mu njila, wakalua kudiye; pakamumoneye, luse luakamukuata, wakalua kudiye, wakamujingila tshilulu pa mputa, wakelapu manyi ne mvinyo; wakamushikika panyima pa nyama wende, wakalua nende ku nzubu wa tshilala benyi, wakamulama bimpe. Pakatshiabu wakapatula ndenatio ibidi (biamu bia argent bu makuta a bantu ba kale), wakapa muena nzubu wa tshilala benyi, wakamuambila ne, Umulame bimpe; panapingana, nenkupingijile binga bintu biwapana. Bantu aba basatu, wewe udi wela meji ne, Muena kuabo ne wakatukidila mu bianza bia banyengi nganyi? Yeye wakakudimuna diyi ne, Wakamufua luse. Yesu wakamuambila ne, Ya biebe wenze muomumue.

(Luka 10:30-37)

### **Lusumuinu Lua Muena Budimi Wakadi Ulomba Bantu Bende Mamuma Ende**

Umvuayi lusumuinu lukuabo: Muena budimi wakadiku, wakatentula mionji ya mamuma a mvinyo mu budimi buende, wakelela budimi lupangu lua mitshi idi isasa, wakimbamu dina dia kukamina mamuma, wakasa nzubu wa batentekedi mule, wakabushiya mu bianza bia ba bidime, wakaya biende ku luseke lukuabo kule. Pakalua tshidimu tshia mamuma pabuipe, yeye wakatuma bantubende kudi ba bidime bua kuangata mamuma ende. Kadi ba bidime bakakuata bantu bende, bakakuma mukuabo, bakashipa mukuabo, munga bakakuma ne mabue. Wakatuma kabidi banga bantu bende batambe ba diambedi; ba bidime

bakabenzela muomumue. Pashishe, wakabatumina muanende, wakamba ne, Nebanemeke muananyi. Kadi ba bidime, pakamonabo muana, bakambilangana ne, Ewu udi mupianyi; tuyayi kumushipa, netuagate bupianyi buende. Bakamukuata, bakamumusha mu budimi, bakamushipa. Palua muena budimi, nenzele ba bidime aba tshinyi? Bobo bakamba ne, Yeye neashipe bantu aba babi, neashiye budimi buende mu bianza bia binga bidime, nebifile mamuma mu bianza biende palua bidimu biawu. Yesu wakabakonka ne, Kanuena banze kubala mu Mukanda wa Nzambi anyi, ne, Dibue diakapidiabo kudi bibaki ba nzubu bakaditeka kumutu kua ditumba; ewu mudimu wa Mukelenge, udi bu bualu bua kukema ku mesu kuetu? Ndi nuambila ne, Nebanunyenge bukelenge bua Nzambi, nebabupe tshisamba tshidi tshikuama mamuma abu. (Matayo 21:33-43)

### **Lusumuinu Lua Mishikankunde Dikumi**

Dituku adi bukelenge bua mu diulu nebuikale bu mishikankunde dikumi, yakangata minda yayi, yakaya kuakidila mubaki wa mukaji. Mishikankunde itanu yakadi mipote, minga itanu yakadi ne meji. Pakangata mipote minda yayi, kayakaya ne manyi makuabo; yakadi ne meji yakaya ne manyi mu mpanza, ne minda. Mubaki wa mukaji kakalua lubilu, mishikankunde yonso yakadi ibunga tulu, yakalala. Pakalua mundankulu, bakela mbila ne, Tangilayi, mubaki wa mukaji! Luayi kumuakidila. Mishikankunde ayi yonso yakabika, yakalongolola minda. Mipote yakambila yakadi ne meji ne, Nutupeku manyi bualu bua minda yetu ikadi ijima. Kadi yakadi ne meji yakandamuna ne, Tudi tuela meji ne, Manyi kaena akumbana bualu buetu ne buenu; nudi mua kuya kudi bapanyi, nudisumbile. Pakayayi bua kusumba manyi, mubaki wa mukaji wakalua; yakadi ne bintu biayi bilongolola yakabuela nende ku disanka dia dibanji; bakinjila tshibi. Pashishe, mishikankunde mikuabo yakalua, yakamba ne, Mukelenge, Mukelenge, utunzuluile. Kadi yeye wakandamuna ne, Bulelela, ndi nuambila ne, Tshiena munumanye. Dimukayi, kanuena bamanye dituku ne pa diba. (Matayo 25:1-13)

© C.E.R.S. - B.P. 1673 Kananga  
**République Démocratique Du Congo**  
Email: 33eme.cers.lit@gmail.com

<http://www.33eme-cers.org/>